

宋史新編

東史新編卷一百六十二

列傳一百四

明南京戶部主事莆田柯維騏著

道學

朱熹

張栻

朱熹字元晦一字仲晦婺源人父松字喬年第十進士歷
司勳吏部郎秦檜決策與金虜議和松率同列上章極
言其不可檜怒風御史論松出知饒州未上卒熹幼穎
悟甫能言父指天示之曰天也熹問曰天之上何物松
異之嘗從羣兒戲沙上獨端坐以指畫沙視之八卦也
年十八貢于鄉紹興十八年第十進士主同安簿選邑秀

民充弟子員禁女婦之爲僧道者罷歸請祠監潭州南
嶽廟明年輔臣薦召以疾辭孝宗卽位求言熹上封事
言帝王之學必先格物致知以極事物之變自然意誠
心正可以應天下之務次言修攘之計不時定者講和
之說誤之也願閉關絕約任賢使能立紀綱勵風俗數
年之後徐起而圖之次言四海利病係斯民之休戚斯
民休戚係守令之賢否監司者守令之綱朝廷者監司
之本也欲民之得其所本原之地亦在朝廷而已隆興
元年復召對其一言大學之道在乎格物以致其知其
一言君父之讎不與其戴天時相湯思退方倡和議除

武學博士待次乾道初促就職既至而洪适爲相復
上和論不合歸陳俊卿劉珙薦爲樞密院編脩官待次
丁內艱工部侍郎胡銓薦與王庭珪同召以未終喪辭
既免喪復召以祿不及養辭梁克家相申前命又辭克
家奏宜褒錄上曰喜安貧守道廉退可嘉特改主管
台州崇道觀再辭不允淳熙二年除秘書郎力辭乃主管
武夷山沖佑觀五年史浩再相除知南康軍值歲不雨
講求荒政多所全活訪白鹿洞書院遺址奏復其舊爲
學規俾守之明年上䟽言天下之務莫大於恤民而恤
民之本在人君正心術以立紀綱蓋天下之紀綱不能

以自立必人主心術公平正大然後有所繫而立君心
不能以自正必親賢臣遠小人然後乃可得而正今宰
相臺省師傅賓友諫諍之臣皆失其職而陛下所與親
密謀議者不過一二近習上以蠱惑陛下之心志下則
招集士大夫之嗜利無恥者文武彙分各入其門交通
貨賂所盜者皆陛下之財命卿置將所竊者皆陛下之
柄且云莫大之禍必至之憂近在朝夕而陛下獨未之
知上讀之大怒熹以疾請祠不報陳俊卿以舊相守金
陵過闕入見薦熹甚力宰相趙雄言於上曰士之好名
陛下疾之愈甚則人之譽之愈衆無乃適所以高之不

若因其長而用之彼漸當事任能否自見矣上以爲然
乃除熹提舉江西常平茶鹽公事旋錄救荒之勞除直
秘閣辭會浙東大饑宰相王淮奏改熹提舉浙東常平
茶鹽公事卽日單車就道入對首陳災異之由與修德
任人之說次言近習便嬖側媚之態足以蠱心志胥史
狡獪之術足以眩聰明雖欲微抑此輩而此輩之勢日
重雖欲兼采公論而士大夫之勢日輕重者旣挾其重
以竊陛下之權輕者又借力於所重以爲竊位固寵之
計邪佞充塞貨賂公行人人皆得滿其所欲惟有陛下
了無所得而顧乃獨受其弊上爲動容所奏凡七事其

一二事手書以防宣洩熹拜命日鉤訪民隱郡縣官吏
憚其風采至自引去所部肅然於救荒之餘隨事處畫
必爲經久之計復奏言爲今之計獨有責躬求言君臣
相戒痛自省改其次惟有盡出內庫之錢以供大禮之
費爲收糴之本詔戶部免徵舊負詔漕臣依條檢放租
稅詔宰臣沙汰監司守臣之無狀者遴選賢能責以荒
政庶幾猶足下結人心知台州唐仲友與王淮同里爲
姻家吏部尚書鄭丙侍御史張大經交薦之遷江西提
刑未行熹行部至台訟仲友者紛然按得其實章三上
焦匿不以聞熹論愈力前後六上淮不得已奪仲友江

西新命以授熹辭不拜遂歸且乞奉祠時鄭丙疏詆程氏學且以沮熹淮又擢陳賈爲監察御史賈面對首論道學者假名以濟僞願擯棄勿用蓋指熹也詔以熹主管台州崇道觀連奉雲臺鴻慶之祠者五年周必大相除熹提點江西刑獄公事淮罷相遂入奏首言刑獄失當次言經總制錢及江西諸州科罰之弊而其末言陛下卽位二十七年因循往蕁無尺寸之效可以仰酬聖志無乃燕閒蠖濩之中爲善不能充其量除惡不能去其根願陛下自今以往一念之頃必謹而察之果天理也則敬以充之而不使其少有壅闕果人欲也則敬以

克之而不使其少有凝滯是行也有要之於路以爲正
心誠意之論上所厭聞熹曰吾平生所學惟此四字豈
可隱默以欺吾君乎時內侍甘昇尚在熹力以爲言上
曰昇乃德壽所薦爲其有才耳熹曰小人無才安能動
人主翌日除兵部郎官以足疾丐祠本部侍郎林栗劾
熹語在栗傳周必大薛叔似援之乃令依舊職江西提
刑葉適上疏與栗辨語在適傳胡晉臣論栗熹同惡異
乃黜栗知泉州熹再辭免除直寶文閣奉祠未踰月再
召熹又辭始熹嘗以爲口陳之說有所未盡乞具封事
以聞至是投匭進封事曰今天下大勢如人有重病內

自心腹外達四支無一毛一髮不受病者且以天下之
大本與今日之急務爲陛下言之大本者陛下之心急
務則輔翼太子選任大臣振舉綱紀變化風俗愛養民
力修明軍政六者是也古先聖王兢兢業業持守此心
是以建師保之官列諫諍之職凡飲食酒漿衣服次舍
器用財賄與夫宦官宮妾之政無一不領於冢宰使其
左右前後一動一靜無不制以有司之法而無纖芥之
隙陛下持守其心果有如此之功乎所以正其左右果
有如此之效乎至於輔翼太子則自王十朋陳良翰之
後稱職者鮮而又時使邪佞儇薄闕冗庸妄之輩參於

其間師傅賓客既不復置而詹事庶子有名無實其左右春坊遂直以使臣掌之至於選任大臣則以陛下之聰明豈不知天下之事必得剛明公正之人而後可以任哉直以一念之間未能徹其私邪之蔽若用剛明公正之人則恐其有妨而不得肆是以排擯此等而後取凡疲懦軟熟平日不敢直言正色之人而揣摩之又於其中得其至庸極陋決可保其不至於有所妨者然後加之於位是以除書未出而物色先定姓名未顯而中外已逆知其決非天下第一流矣至於振肅紀綱變化風俗則今日宮省之間禁密之地而天下不公之道不

正之人顧乃得以窟穴盤據於其間是以紀綱不正於上風俗頽弊於下大率習爲軟美依阿甚者以金珠爲脯醢以契券爲詩文惟得之求無復廉恥一有剛毅正直守道循理之士出乎其間則群議衆排指爲道學而禁錮之必使無所容其身而後已此豈治世之事哉至於愛養民力修明軍政則自虞允文之爲相也盡取版曹歲入羨餘之數而輸之內帑以備他日用兵進取不時之須二十餘年內帑歲入不知幾何而認爲私貯典以私人日銷月耗以奉燕私之費曷嘗聞其能易敵人之首如太祖之言哉徒使版曹經費闕乏日甚督促日

峻中外承風競爲苛急此民力之所以重困也諸將之
求進也必先措剋士卒以殖私利然後以此自結於陛
下之私人而斬以姓名達於陛下之貴將貴將以付軍
中使自什伍以上保稱材武陛下以爲公薦可以得人
而豈知其論價輸錢已若晚唐之債帥哉彼智勇材略
之人孰肯抑心下首於宦官宮妾之門而陛下之所得
皆庸夫走卒而猶望其激勸士卒以彊國勢豈不誤哉
凡此六事本在於陛下之一心一心正則六事無有不
正矣疏入夜漏下七刻上已就寢亟起秉燭讀之終篇
明除主管太一宮兼崇政殿說書熹力辭除秘閣修

撰奉外祠光宗卽位再辭職名仍舊直寶文閣居數月
除江東轉運副使以疾辭改知漳州奏除無名之賦減
經總制錢以習俗未知禮采古喪葬嫁娶之儀揭以示
之常病經界不行會朝論欲行泉汀漳三州經界喜乃
訪事宜上之宰相留正泉人也其里黨多以爲不可行
布衣吳禹圭上書訟其擾人有旨先行漳州經界明年
以子喪請祠時史浩入見請收天下人望乃除熹秘閣
修撰主管南京鴻慶宮再辭優詔不允乃拜命除荆湖
南路轉運副使辭漳州經界竟報罷以言不用自劾除
知靜江府辭主管南京鴻慶宮未幾差知潭州力辭黃

裳爲嘉王府翊善自以學不及熹乞召爲宮僚王府直
講彭龜年亦爲大臣言之留正曰正非不知熹但其性
剛恐到此不合反爲累耳優詔不允辭乃拜命寧宗卽
位趙汝愚首薦熹及陳傅良除煥章閣待制侍講辭不
許入對首言乃者太皇太后躬定大策陛下寅紹不圖
可謂處之以權而庶幾不失其正今三月矣或反不能
無疑於逆順名實之際陛下盡負罪引慝之誠致溫清
定省之禮而大倫正大本立矣時論者以爲上未還大
內則名體不正而疑議生有旨修葺舊東宮爲屋三數
百間欲徙居之熹奏疏言此必左右近習倡爲此說以

誤陛下而欲因以遂其姦心臣恐上帝震怒災異數出
不當興此大役以拂譴告警動之意亦恐畿甸百姓沾
於死亡或能怨望忿切以生他變又聞太上皇后懼忤
太上皇帝聖意不欲其聞太上之稱又不欲其聞內禪
之說此又慮之過者父子大倫三綱所繫久而不圖亦
將有借其名以造謗生事者此又臣之所大懼也願陛
下罷修葺東宮之役回就慈福重華草創寢殿使粗可
居又願下詔自責減省輿衛入宮之後暫變服色如唐
肅宗之改服紫袍執控馬前者則太上皇帝雖有忿怒
之情亦且霍然消散而歡意浹洽矣至若朝廷之紀綱

則號令之弛張人才之進退一委之二三大臣反覆較量有不當者繳駁論難擇其善者稱制臨決則不惟近習不得干預朝權大臣不得專任已私而陛下亦得以益明習天下之事而無所疑於得失之筭矣若夫山陵之下則願黜臺史之說別求草澤以營新宮使壽皇之遺體得安而宗社生靈皆蒙福矣疏入不報熹又奏漢文短喪歷代因之三綱不明千有餘年壽皇聖帝易月之外猶執通喪朝衣朝冠皆用大布陛下以世嫡承大統則承重之服著在禮律遂用漆紗淺黃之服臣竊痛之會孝宗祔廟議宗廟迭毀之制自太祖皇帝首尊四

祖之廟治平間議者以世數遠議遷僖祖於夾室後
下安石等奏僖祖有廟與稷契無異請復其舊時相趙
汝愚雅不以復祀僖祖爲然侍從多從其說吏部尚書
鄭僑欲且祧宣祖而祔孝宗喜以爲神宗得禮之正所
謂有舉之而莫敢廢者乎又擬爲廟制以辨以爲物豈
有無本而生者廟堂不以間卽毀徹僖宣廟室更創別
廟以奉四祖始寧宗之立韓侂冑用事熹憂其害政上
疏斥言左右竊柄之失在講筵復申言之御批云憫卿
耆艾恐難立講已除卿宮觀汝愚袖御筆還上且諫且
拜內侍王德謙徑以御筆付熹臺諫爭留不可樓鑰陳

傳良旋封還錄黃修注官劉光祖郤驛封章交上熹行
被命除寶文閣待制與州郡差遣辭尋除知江陵府辭
詔依舊煥章閣待制提舉南京鴻慶宮初趙汝愚既相
中外引領望治熹獨以侂冑爲慮既屢爲上言又數以
手書啓汝愚勿使得預朝政汝愚謂其易制不以爲意
及是汝愚亦以誣逐而朝廷大權悉歸侂冑矣熹始以
廟議自劾不許以疾再乞休致詔依舊秘閣修撰沈繼
祖爲監察御史誣熹十罪詔落職罷祠門人蔡元定亦
送道州編管熹以年近七十申乞致仕從之卒年七十
一疾且革手書屬其子及諸門人拳拳以勉學及脩經

遺書爲言翌日正坐整衣冠就枕而逝熹登第五十年
仕於外者僅九考立朝纔四十日家故貧少依父友劉
子羽寓建之崇安後徙建陽之考亭自熹去國低眉勢
益張何澹爲中司首論專門之學乞辨真僞劉德秀不
爲張栻之徒所禮及爲諫官首論僞學太常少卿胡紘
言比年僞學猖獗圖爲不軌遂召陳賈爲兵部侍郎未
幾熹有奪職之命劉三傑以前御史論熹汝愚劉光祖
徐誼之徒前日之僞黨至此又變而爲逆黨即日除三
傑右正言右諫議大夫姚愈論道學權臣結爲死黨窺
伺神器乃命直學士院高文虎草詔諭天下於是攻僞

學日急選人余喜至上書乙斬熹方是時士之繩趨尺
步稍以儒名者無所容其身從游之士特立不顧者昇
伏立壑依阿異儒者更名他師過門不入而熹日與諸
生講學不休熹將葬言者謂四方僞徒期會送僞師之
葬會聚之間非妄談時人短長則繆議時政得失望令
守臣約束從之侂冑死詔賜熹遺表恩澤謚曰文加贈
寶謨閣直學士理宗贈太師追封信國公改徽國始熹
父病亟屬曰籍溪胡原仲白水劉致中屏山劉彥沖三
人學有淵源吾卽死汝徃事之延平李侗老矣熹歸自
同安不遠數百里徒步徃從之其爲學大抵窮理以致

其知反躬以踐其實而以居歟爲主所著書有易本義
啓蒙著卦考誤詩集傳大學中庸章句或問論語孟子
集註太極圖通書西銘解楚辭集註辨證韓文考異所
編次有論孟集議孟子指要中庸輯略孝經刊誤小學
書通鑑綱目宋名臣言行錄家禮近思錄河南程氏遺
書伊洛淵源錄熹後學庸語孟訓說并儀禮經傳通解
未脫藁俱立在學官淳祐元年詔以周張二程及熹從
祀孔子廟黃榦曰由孔子而後曾子子思繼其微至孟
子而始著由孟子而後周程張子繼其絕至熹而始著
蓋知言也熹季子在吏部侍郎曾孫浚兵部侍郎福安

府尹王剛中以城降元浚自殺

張栻字敬夫丞相浚子也穎悟夙成長師胡宏一見卽以孔門論仁親切之旨告之栻退而思若有得焉宏稱之曰聖門有人矣栻益自奮厲以古聖賢自期作希顏錄以蔭補官孝宗新卽位浚起謫籍開府治戎參佐皆極一時之選栻時以少年內贊密謀外參庶務諸人皆自以爲不及也間以軍事入奏因進言曰陛下上念宗社之讎恥下閔中原之塗炭惕然於中而思有以振之臣謂此心之發卽天理之所存也願稽古親賢以自輔則今日之功可以必成而因循之弊可革矣孝宗異其

言遂定君臣之契浚去位湯思退用事遂罷兵講和浚
已沒拭營葬甫畢卽拜疏言吾與金人有不共戴天之
讎繼今以往益堅此志誓不言和專務自強雖折不撓
遲以歲月何功之不濟哉疏入不報久之劉珙薦於上
除知撫州未上改嚴州奏言先王所以建事立功無不
如志者以其胸中之誠有以感格天人之心而與之無
間也今規畫雖勞而事功不立陛下誠深察之亦有私
意之發以害吾之誠者乎明年召爲吏部侍郎兼權起
居郎侍立官時宰方謂敵勢衰弱可圖拭見上曰臣切
見比年諸道多水旱民貧日甚而國家兵弱財匱官吏

誕謾不足倚輔正使彼實可圖臣懼我之未足以圖彼也
因出所奏疏讀之曰必勝之形當在於早正素定之時
而不在於兩陣決機之日今日但當修德立政用賢
養民選將帥練甲兵通內修外攘進戰退守以爲一事
且必治其實而不爲虛文則必勝之形隱然可見上爲
歎息褒諭以爲前始未聞此論也史正志爲發運使名
爲均輸實盡奪州縣財賦遠近騷然士大夫爭言其害
拭亦以爲言上閱其實卽詔罷之兼侍講除左司員外
郎講詩葛覃進說治生於敬畏亂起於驕淫因上陳祖
宗自家刑國之懿下斥今日興利擾民之害上歎曰此

安石所謂人言不足恤者所以爲誤國也知閣門事
張說除簽書樞密院事栻夜草疏極諫旦詣朝堂質責
宰相虞允文曰官官執政自京黼始近習執政自相公
始栻奏再上命遂中寢然宰相實陰附說明年出栻知
袁州申說前命中外誼譁說竟以謫死栻在朝末期歲
而召對至六七所言皆脩身務學畏天恤民抑僥倖屏
讒諛於是宰相憚之近習尤不悅退而家居累年孝宗
念之除知靜江府經略安撫廣南西路部內荒殘多盜
栻簡州兵籍黥卒伉健者日習月按申嚴保伍法諭溪
峒酋豪毋相殺掠朝廷買馬橫山歲久弊滋邊氓告病

而馬不時至杖究利病六十餘條奏革之諸蠻感悅歲
得善馬治行聞進秩直寶文閣尋除祕閣修撰荆湖北
路轉運副使改知江陵府安撫本路一日去貪吏十四
人湖北多盜首劾大吏之縱賊者捕斬姦民之舍賊者
令其黨得相捕告以除罪群盜皆遁云並准奸民出塞
爲盜者捕得數人北方亡奴亦在盜中弑曰朝廷未能
正名討敵無使疆場之事其曲在我命斬以徇於境而
縛亡奴歸之北人歎曰南朝有人信陽守劄大辨怙勢
希賞弑劾請論罪不報弑求去詔以右文殿修撰提舉
武夷沖佑觀病且死手疏親君子遠小人信任防一已

之偏好惡公天下之理拭有公輔之望卒年四十八世
咸惜之拭嘗言學莫先於義利之辨有所爲而爲皆利
也朱子謂與性善養氣之論同功云所著有論語說及
書詩孟子太極圖說經世編年等書

蔡元定

字元

黃榦

李燾

張洽

陳淳

李方子

黃灝

俱朱氏門人

蔡元定字季通建陽人父發博覽群書號牧堂老人以
程氏語錄邵氏經世張氏正義爲援元定曰此孔孟正脉
也元定深涵其義既長辨析益精登西山絕頂忍飢啖
齋讀書聞朱熹名往師之熹和其學大驚曰此吾老友

也不當在弟子列四方來學者熹必俾先從元定質正
焉從臣尤袤楊萬里聯疏薦于朝召之堅以疾辭時韓
侂冑禁偽學臺諫承風肆排擊然猶未敢誦言攻朱熹
至沈繼祖劉三傑連疏詆熹併及元定元定曰化性起
偽惡得無罪遂謫道州州縣捕急元定聞命不辭家卽
就道熹與從游數百人餞蕭寺中坐客有泣下者熹視
元定不異平時因喟然曰友朋相愛之情李通不挫之
志可謂兩得矣元定賦詩曰執手笑相別無爲兒女悲
杖屨同其子沉行三千里脚爲流血無幾微見言面至
春陵遠近從者日衆有名士挾才簡傲非笑前修者亦

心服謁拜人爲之語曰初不敬今納命愛元定者謂宜
謝生徒元定曰彼以學來何忍拒之若有禍患亦非閉
門塞竇所能避也貽書訓諸子曰獨行不愧影獨寢不
愧衾勿以吾得罪故遂懈一日謂沉曰可謝客吾欲安
靜以還造化舊物閏三日卒侂冑旣誅贈迪功郎謚文
節元定於書無不讀於事無不究凡奇奧古書一過目
輒解熹嘗曰人讀易書難季通讀難書易書疏釋四書
及爲易詩傳通鑑綱目皆與參訂啓蒙一書則屬起藁
學者尊之曰西山先生所著有大衍詳說律呂新書燕
樂原辯皇極經世太玄潛虛指要洪範解八陣圖說熹

爲之序及彝彞誅之曰精誥之識卓絕之才不可屈之
志不可窮之辯不復可得見矣于淵沉竝躬耕不仕淵
有周易訓解沉字仲默少從熹游熹書傳未及爲元定
洪範數未及論著皆以屬沉沉沈潛反復數十年然後
成書其序洪範數曰體天地之撰者易之象紀天地之
撰者範之數數始於一象成於二一者奇二者偶也奇
者數之所以行偶者象之所以立故二而四四而八者
八卦之象也一而三而九者九疇之數也由是重之
八而六十四六十四而四千九十六而象備矣九而八
十一八十一而六千五百六十一而數周矣易更四聖

而象已著範錫神禹數不傳後之作者昧象數之原
室變通之妙或卽象以爲數或反數而擬象牽合傳會
自然之數益晦焉初從父謫道州楚粵窮僻常以理義
自怡悅父沒徒步護喪以還年僅三十屏去舉子業一
以聖賢爲師隱居九峯當世名卿物色將薦用之不屑
就次子抗別有傳

黃榦字直卿閩縣人父瑀在高宗時爲監察御史以篤
行直道著聞瑀沒榦往見清江劉清之清之奇之因命
受業朱熹榦自見熹夜不設榻不解帶少倦則微坐一
倚或至達曙嘗詣京萊呂祖謙以所聞於熹者相質正

及張栻亡熹與榘書曰吾道益孤所望於賢者不輕後
遂以其子妻榘寧宗卽位熹命榘奉喪補將仕郎榘中
授迪功郎監台州酒務丁母憂學者從之講學于墓廬
甚衆熹編禮書獨以喪祭二編屬榘病革以深衣及所
著書授榘手書與訣榘持心喪三年畢調監嘉興府石
門酒庫歷通判安豐軍淮西帥司檄鞫和州獄故以
疑未決榘一夜夢井中有人果於廢井得尸尋知漢陽
軍值歲飢荒政具舉民大感悅卽郡治後鳳栖山爲屋
館四方士立周程游朱四先生祠以病乞祠主管武夷
冲佑觀尋起知安慶府至則金人破光山乃請于朝創

郢城以備戰守不俟報而興役榦日以五鼓坐于堂
澤若官入聽命以一日成算授之受命畢乃治府事會僚
佐講究邊防利病次則督視城役晚入書院講論經史
築城之杵用錢監未鑄之鐵事畢還之後二年金人破
黃州沙窩諸關淮東西皆震獨安慶按堵如故繼而霖
潦餘月巨浸暴至城屹然無虞舒人德之相謂曰不殘
于寇不蹈于水生汝者黃父也制置李珣辟爲叅議官
再辭不受旣而朝命與徐僑兩易和州且令先赴制府
稟議榦卽日解印趨制府先是榦移書珣有曰今日之
計莫若用兩淮之人食兩淮之粟守兩淮之地然其策

當先明保伍保伍旣明則爲之立堡砦蓄馬制軍器以資其用不過累月軍政可成珏不能用及至制府珏往維揚視師與偕行榦言敵旣退當思所以賞功罰罪者其時幕府書館皆輕儇浮靡之士僚吏士民有獻謀畫多爲毀抹疏駁將帥偏裨人心不附所向無功流移滿道而諸司長吏張宴無虛日榦知不足與共事歸自維揚再辭和州之命仍乞祠閣謝客宴樂不與乃復告珏曰浮光敵退已兩月安豐已一月盱眙亦將兩旬不知吾所措置者何事所施行者何策但聞請總領運使至王麟堂賞牡丹用妓樂又聞總領運使請宴賞亦然

又聞宴僚屬亦然。浮光之報又至矣。金欲以十六縣之衆四月攻浮光。使五關五關失守則蘄黃決不可保。蘄黃不保則江南危。尚書聞此亦已數日。乃不聞有所施行。何耶。其他言皆激切。同幕忌之尤甚。其詆排之厥後。先黃蘄繼失。果如其言。遂力辭去。俄再命知安慶。不就。入廬山訪其友李燔。陳宓相與盤旋。王淵三峽間。僥仰其師舊跡。未幾召赴行在所。奏事除大理丞。不拜。爲御史李楠所劾。初。榦入荆湖。幕府奔走諸關。與江淮豪傑游。而豪傑往往願依榦。及倅安豐武定諸將皆歸心。後倅建康守漢陽。聲聞益著。諸豪又深知榦。僞有謀。

及守安慶且兼制幕長淮軍民之心翕然相向此聲既
出在位者益忌且慮榦入見必直言邊事以悟上意至
是羣起擠之榦遂歸里弟子日盛巴蜀江湖之士皆來
俄命知湖州辭不行差主管亳州明道宮踰月遂乞致
仕許之特授承議郎卒贈朝奉郎錄其子謚文肅有經
解文集行于世

李燔字敬子建昌人紹熙元年第進士授岳州教授未
上往建陽從朱熹學熹告以曾子弘毅之語燔退以弘
名其齋而自微焉既至岳州教士以古文六藝不因時
好且曰古之人皆通材用則文武兼焉卽武學諸生文

振而識高者拔之改襄陽府教授復往見熹熹嘉之凡
諸生未達者先令訪燔俟有所發乃從熹折衷諸生畏
服熹沒學禁嚴燔率同列往會葬不少休凡江守薦召
都堂審察辭再召再辭郡守請爲白鹿書院堂長學者
雲集除大理司直辭尋添差江西運司幹辦公事洞寇
作亂燔請自往駐兵萬安察隅保之尤無良者易置之
分兵守險馳辯士諭賊逆順禍福寇皆帖服漕司以十
四界會于新行償日損乃視民稅產物力各藏會于若
十官爲封識不時點閱人愛重之則價可增慢令者黥
籍而民壽張持空券益不售燔與國子學錄李誠之力

爭不能止燔又入劄爭之漕司卽弛禁改通判潭州真
德秀爲長沙帥一府之事咸諮燔不數月辭歸當是時
史彌遠當國廢皇子竑燔以三綱所關自是薦辟不復
出矣乃以直秘閣奉祠紹定五年帝論及當時高士累
召不起者史臣李心傳以燔對且曰朱熹高弟經術行
義亞黃榦當今海內一人而已帝然其言終不召也九
江蔡念成稱燔心事有如秋月卒年七十贈直文華閣
諡文定錄其子燔嘗曰凡人不必待仕宦有位爲職事
方爲功業但隨力到處有以及物卽功業矣又嘗曰仕
宦至卿相不可失寒素體入仕凡四十二年而歷官不

過七考學者宗之與黃幹並稱孫鑣登進士第

張洽字元德臨江人父綏第進士洽少穎異從朱熹學
博極群書嘗取管子思之思之又重思之思之不通鬼
神將通之之語以爲窮理之要熹嘉其篤志時行社倉
法洽貸縣常平米二百石建倉里中六年而歸其本鄉
人利之嘉定元年中第授松滋尉湖右經界不正洽請
行推排法令以委洽吏姦無所匿改袁州司理參軍有
盜黠甚辭不能折會有兄弟訟財者洽諭之曰冒法以
求勝孰與各守分以全手足之愛乎訟者感悟盜聞之
自伏民有殺人賄其子焚之命有其獄無狀俄夢有人

拜于庭示以傷在脅翌日委官上其事果然知永新縣
湖寇作亂與縣接壤民大恐洽單車以往邑佐寓士交
諫弗聽至則寇未嘗至乃延見隅官訪利害而犒之又
結約土豪得其懽心未幾南安舒寇將犯境聞有備乃
去用薦通判池州歲大旱禱弗應洽言於提點常平袁
甫辯冤獄白守寬催科三日果大雨後從其請與祠時
袁甫提刑江東以白鹿書院廢弛招洽爲長洽曰是先
師之跡也其可辭已復謝病去端平初用薦召都堂審
察不赴除祕書郎尋遷著作佐郎帝數問張洽何時可
到將以說書待洽洽固辭遂除直祕閣主管建康崇禧

觀嘉熙元年以疾乞致仕數月卒年七十七卒後一日
有旨除直寶章閣洽自少用力於敬故以主一名齋所
著有春秋集注春秋集傳左氏蒙求續通鑑長編事聖
子櫟樾賜同進士出身

陳淳字安卿龍溪人少習舉子業林宗臣授以近思錄
淳遂盡棄其業及朱熹來守其鄉淳請受教熹教語人
以南來吾道喜得陳淳熹卒淳追思師訓痛自裁抑無
書不讀無物不恪其語學者曰盈天地間千條萬緒是
多少人事聖人大成之地千節萬目是多少工夫惟當
開拓心胷須萬理明徹然後可以語孔孟之學須明三

代法度通之於今而無不宜然後可以語王佐事業至
於以天理人欲分數而驗賓主進退之機如好好色惡
惡臭而爲天理人欲強弱之證此語又中學者膏肓而
示以標的也淳性至孝弟妹未有室家者皆婚嫁之葬
宗族之喪無歸者世雖不用而憂時論事感慨動人郡
守以下皆禮重之時造其廬而請焉嘉定九年待試中
都歸遇嚴陵郡守鄭之梯率僚屬延講郡庠淳歎張陸
王學問無源全用禪家宗旨遂發明吾道之體統師友
之淵源用功之節目讀書之次序爲四章以示學者明
年以特奏恩授迪功郎泉州安溪主簿未上而卒年六

十五其所著有語孟大學中庸口義等書

李方子字公晦昭武人性端謹純篤初見朱熹謂曰觀公爲人自是寡過但寬大中要規矩和緩中要果決遂以果名齋入太學廷對擢第三調泉州觀察推官守真德秀以師友禮之故事秩滿必先通書廟堂乃除方子曰以書通是求也丞相史彌遠聞之怒踰年始除國子錄無何將選入宮僚而方子不少貶以求合或告彌遠曰此真德秀黨也使臺臣劾罷之方子嘗語人曰吾於問學雖未能周盡然幸於大本有見處此心常覺泰然不爲物欲所漬爾其亡也天子閔之與一子恩澤

黃灝字商伯都昌人入太學登進士第教授隆興府知
德化縣以興學校崇政化爲本薦除登聞鼓院光宗卽
位歷太府寺丞出知常州提舉本路常平時芋薤盈野
或食其子持一臂行乞而州縣方督促逋欠灝見之蹙
然有旨停閣夏稅遂奏乞併閣秋苗不俟報行之言者
非其專移居筠州已而寢謫命止削兩秩而從其蠲閣
之請起知信州改廣西轉運判官移廣東提點刑獄告
老不赴卒灝性行端飭以孝友稱朱熹守南康灝執弟
子禮熹沒黨禁方厲灝單車往赴徘徊不忍去云

宋史新編卷一百六十三

列傳一百五

明南京戶部主事莆田柯維騏著

儒林

諸家之學莫尚於儒自古非否運昏朝寧弗知敦崇爲致理之助哉五季構亂五十年志士率抱經伏農野宋興聿脩文教物色儒術於是長裾大袖雲會有司父老見而喜曰此曹出天下必太平矣迨重熙累洽學校遍州郡而俗以通經學古爲高紹聖以後負盛名者遭嚴譴終不肯自諱輟其素業未造凜凜不支已草茅猶獻著述經筵猶日勸講蓋祖宗振作涵育之澤雖久而未

艾也抑考仲尼所述儒行非賢哲何以與此後世君子
卽希之而未逮亦儒之徒也宋舊史有胡旦陳暘議者
頗少其行奚可與孫復胡瑗諸人班乎他若任道者尚
志者及有文藻忠勳者已見別傳茲不復錄

聶崇義

邢昺

孫奭

王昭素

孔維

孔宜

崔頌

子臚

尹拙

田敏

辛文悅

李覺

崔頤正

弟儼
全附

李之才

聶崇義洛陽人少舉三禮漢累官至國子禮記博士周
顯德中累遷國子司業兼太常博士先是世宗以郊廟

祭器止由有司承襲製造年代浸久無所規式乃命崇義檢討摹畫以聞既上乃命有司別造五年將禘於太廟故事者以宗廟無祧室不當行禘祫之禮崇義援引故事上言其略曰魏明帝以景初三年正月上僊至五年二月祫祭明年又禘自茲後以五年爲禘且魏以武帝爲太祖至明帝始三帝未有毀主而行禘祫其證一也宋文帝元嘉六年祠部定十月三日大祠其太學博士議云案禘祫之禮三年一五年再宋高祖至文帝裁亦二帝未有毀主而行禘祫其證二也梁武帝用謝廣議三年一禘五年一祫謂之大祭禘祭以夏祫祭以冬

且梁武乃受命之君裁追尊四朝而行禘祫則知祭者是追養之道以時移節變孝子感而思親故薦以首時祭以仲月間以禘祫序以昭穆乃禮之經也非關宗廟備與未備其證三也終從其議未幾世宗詔參定郊廟祭王又詔翰林學士竇儼統領之崇義取三禮圖再加考正宋建隆三年四月表上之儼爲序太祖覽而嘉之詔太子詹事尹拙集儒學三五人參議苟有異同善爲商確五月賜崇義紫袍犀帶銀器繒帛以獎之拙多所駁正崇義復引經釋之悉以下戶部尚書竇儀裁定儀上奏曰聶崇義耽味禮經良有新意尹拙爰承制旨能

聲所聞尹拙駁議及聶崇義荅義各四卷臣詳閱增損
列於注釋共分爲十五卷以聞詔頒行之崇義後陳祭
鼎釜異同之說詔下中書省集議吏部尚書張昭等
議曰周禮玉人之職只有璧琮九寸瑑琮八寸及璧
度尺好三寸以爲度之文卽無以璧黃琮之制漢代
儒頗多著述計尋祭玉並無尺寸之說魏晉之後鄭
玄王肅之學各有生徒三禮六經無不論說亦不言祭
玉尺寸崇義等以諸侯入朝獻天子夫人之琮璧以爲
祭玉又配合羨度肉好之言彊爲尺寸於理未通又據
尹拙所述禮神之六玉稱取梁桂州刺史崔靈恩所撰

三禮義宗內昊天及五精帝圭璧琮璜皆長尺二寸以
法十二時祭地之琮長十寸以倣地之數又引白虎通
云方中圓外曰璧圓中方外曰琮崇義非之爲不合禮
臣等聿稽古訓天子以鎮圭外守宗后以大琮內守皆
長尺有二寸又裸圭尺二寸王者以祀宗廟若人君親
行郊祭手秉尺二之圭神獻九寸之璧不及禮宗廟裸
圭之數父天母地情亦奚安則靈恩議論理未爲失所
以歷梁陳隋唐垂四百年言禮者引爲師法伏望依白
虎通義宗唐禮之制以爲定式又尹拙依舊圖畫金蟲
樂義去金畫鏤臣等參詳舊圖皆有金無鏤按易

天地爲金詩云惟錡及釜其來尚矣崇義以周官祭祀
有省鼎鑊供鼎鑊又以儀禮有羊鑊豕鑊之文請兩圖
之未幾崇義卒三禮圖遂行於世并畫於國子監講堂
之壁崇義爲學官兼掌禮僅二十年世推其該博郭忠
恕嘗以其姓嘲之曰近貴全爲贖蔡龍卽作龔雖然三
箇耳其奈不成聰崇義對曰僕不能爲詩聊以一聯奉
荅卽云勿咲有三耳全勝畜二心蓋因其名以嘲之真
儒者之戲云

邢昺字叔明濟陰人太平興國初舉五經廷試召升殿
講卽比二卦又問以群經發題太宗嘉其精博擢九經

及第授大理評事知泰州鹽城監賜錢二十萬歷國子
博士賜緋選爲諸王府侍講案遷右諫議大夫咸平初
改國子祭酒二年始置翰林侍講學士以曷爲之受詔
與徐鉉等校定周禮儀禮公羊穀梁春秋傳孝經論語
爾雅義疏遷工部侍郎兼國子祭酒學士如故俄權知
審官院景德二年上幸國子監閱庫書曷曰臣少從師
業儒時經具有疏者百無一二蓋力不能傳寫今板本
大備士庶家皆有之斯乃儒者逢辰之幸也三年加刑
部侍郎曷居近職常多召對四年曷以羸老自陳曹州
故鄉願給假一年歸視田里上命坐慰勞之因謂曰便

可權本州何須假耶曷又言楊礪夏後嶠同爲府僚三
臣沒皆贈尚書上憫之翌日謂宰相曰此可見其志矣
即超升工部尚書知曹州職如故大中祥符初上東封
泰山曷表曹州民請車駕經由本州仍令濟陰令王範
部送父老詣闕優詔答之俄召還進禮部尚書二年被
病請告上親臨門賜名藥白金綵絲國朝故事非宗戚
將相無省疾臨喪之礼特有加於曷與郭贊者以恩舊
故也未幾有旨命中書召其子太常博士知東明縣仲
寶國子博士知信陽軍若思還侍疾踰月卒年七十九
贈左僕射初雍熙中曷撰禮選二十卷獻之太宗採其

帙得文王世子篇觀之甚悅上嘗因內閣曝書覽而稱
善召昺同觀作禮選贊賜之先是咸平中王欽若知貢
舉有告其受舉人賄者下御史臺鞫得狀欽若自訴詔
昺等覆推昺力爲辨欽若德之昺厚被寵顧欽若與有
功焉事在欽若傳

孫奭字宗古博平人九經及第爲莒縣主簿上書願試
講說遷大理評事爲國子監直講太宗臨幸召奭講尚
書賜五品服真宗以爲諸王府侍讀累擢龍圖閣待制
大中祥符初得天書召問宰相王旦等對曰天貺符命
實盛德之應皆再拜稱萬歲又召問奭對曰臣愚所聞

天何言哉豈有書也是歲天書復降帝以親受符命遂
議封禪四年又將祀汾陰是時大旱京師近郡穀踊貴
吏上疏諫曰先王卜征五年歲習其祥祥習則行不習
則增修德而改卜陛下始畢東封更議西幸殆非先王
卜征五年慎重之意昔者周宣王遇災而懼故詩人美
其中興陛下宜側身脩德以答天譴豈宜下徇姦回遠
勞民庶入民神之主也今國家土木之功累年未息水
旱沴沴饑饉居多乃欲勞民事神神其享之乎唐明皇
以嬖寵姦邪內外交害身播國屯兵交關下亡亂之迹
如此由徂於承平肆行非義稔致禍敗今議者引開元

故事以爲盛烈導陛下而爲之臣切爲陛下不取臣言
不逮意陛下以臣言爲可取願少賜清問以畢臣說帝
遣內侍皇甫繼明就問又上疏曰陳勝起於徭戍黃巢
出於凶饑隋煬帝勤遠略而唐高祖興於晉陽晉少主
惑小人而耶律德光長驅中國陛下俯從姦佞遠棄京
師涉仍歲存饑之墟修違經久廢之祠不念民疲不恤
邊患安知今日戍卒無陳勝饑民無黃巢英雄將無冠
伺於肘腋外敵將無觀釁於邊陲乎先帝嘗欲北平幽
朔西取繼遷大勳未集用付陛下則群臣未嘗獻一謀
畫一策以佐陛下繼先帝之志者反務卑辭重幣求和

於契丹虜國廢幽姑息於繼遷撰造祥瑞假託鬼神纔
畢東封便議西幸輕勞車駕虐害饑民冀其無事往還
便謂成大勳績是陛下以祖宗艱難之業爲姦邪僥倖
之資臣所以長嘆而痛哭也後天下數有災變又言今
野鷗山鹿郡國交奏秋旱冬雷群臣率賀退而腹非竊
笑者比比皆是孰謂上天爲可罔下民爲可愚後世爲
可欺乎六年又上疏曰明皇禍敗之迹有足爲深戒者
非獨臣能知之近臣不言者此懷姦以事陛下也明皇
奔至馬嵬軍士已誅楊國忠請矯詔之罪乃始諭以識
理不明寄任失所雖有罪已之言何所及也臣願陛下

早自覺寤斥遠邪佞罷興土木無爲明皇不及之悔父之以父老請歸田里不許以知密州居二年遷左諫議大夫罷待制還糾察在京刑獄復出知河陽又求解官就養遷給事中徙兗州天禧中朱能獻乾祐天書復上疏曰昔漢文成五利二人皆坐誅先帝時有侯莫陳利用者暴得寵用一旦發其姦誅於鄆川漢武可謂雄材先王可謂英斷唐明皇得靈寶符上清護國經寶券等皆王鉷田同秀等所爲明皇不能顯戮怵於邪說旣惑左道卽紊政經民心用離變起倉卒當是之時老君寧肯禦兵寶符安能排難邪今朱能所爲或類於此未幾

能果敗仁宗卽位乃召爲翰林侍講學士知審官院判
國子監丁父憂起復兼判太常寺及禮院三遷兵部侍郎
龍圖閣學士嘗畫無逸圖上之帝施於講讀閣三請
致仕不允求近郡優拜工部尚書復知兗州詔須宴而
後行以恭謝恩改禮部尚書旣而累表乞歸以太子少
傅致仕疾甚徙正寢屏婢妾曰無死婦人之手計聞帝
悼甚贈左僕射諡曰宣夷性方重事親篤孝父亡舐其
面以代頰常掇五經切治道者爲經典微言五十卷又
撰崇祀錄樂記圖五經節解嘗奉詔與邢昺杜鎬校定
諸經正義莊子爾雅釋文子瑜有傳見上

王昭素開封人少篤學不仕有至行爲鄉里所稱常聚徒教授以自給李穆與弟肅及李惲皆嘗師事焉鄉人爭訟不詣官府多就昭素決之昭素博通九經兼究莊老尤精詩易以爲王韓注易及孔馬疏義或未盡是乃著易論二十三篇開寶中穆薦之朝召見時年七十七精神不衰太祖問曰何以不求仕進致相見之晚賜坐令講易乾卦至飛龍在天對曰此書非聖人出不能合其象因訪以民間事誠實無隱上嘉之以衰老求歸拜國子博士致仕賜茶藥及錢二十萬留月餘遣之年八十九卒於家昭素每市物還直不論高下縣人相告曰

王先生市物無得高取其價也家有一驢人多來假將
出先問僮奴曰外無假驢者乎對云無然後出其爲純
質若此子仁著亦有隱德

孔維字爲則雍丘人乾德四年九經及第歷滁州軍事
推官太宗卽位累擢爲國子司業賜金紫會將有事籍
田維稽舊典起周禮至唐書凡沿革制度並錄以獻又
上書請禁原蠶以利國馬直史館樂史駁之曰古先哲
王厚農桑之業以其爲衣食之原耳孔維徒引前經物
類同氣之文不究時事確實之理編民之內貧窶者多
春蠶所成止充賦調之備晚蠶薄利始及立歲之資今

若禁其後圖民豈皇寧上覽之遂寢晚蠶之禁繼復抗
疏曰按周禮夏官司馬職禁原蠶者爲傷馬也原再也
蠶與馬同氣物莫能兩大故禁再蠶以益馬也按本草
注以僵蠶塗馬齒則不能食草物類相感如此月令仲
春祭馬祖季春享先蠶皆謂天駟房星也爲馬祈福謂
之馬祖爲蠶祈福謂之先蠶是蠶與馬同其類爾蠶重
則馬損氣感之而然也臣謂依周禮禁原蠶爲當上雖
不用維言而嘉其援引經據以章付史館籍田畢拜國
子祭酒淳化初兼工部侍郎明年卒年六十四太宗尹
京日維爲屬邑吏頗以經術受知卽位後維求爲司業

即以授之及爲祭酒又奏兼侍郎上從之然搢紳惡其
儒者躁求無退讓之風直宗錄其孫禹圭

孔宜字不疑兗州曲阜人孔子四十四世孫孔子生鯉
字伯魚鯉生伋字子思伋生白字子上白生永字子家
永生箕字子京箕生穿字子高穿生謙字子慎謙生鮒
字子魚以弟子騰爲嗣騰字子襄值秦難藏其家書于
屋壁騰生正字季忠正生武武生延年及安國延年主
霸字次孺漢元帝賜爵關內侯號褒成君霸生福福生
房房生均字長平平帝封爲褒成侯追諡夫子爲褒成
宣尼公世祖復封均子志爲褒成侯諡元成志生損襲

爵和帝徙封褒亭侯損卒千戶嗣侯邑千戶元嗣邑
百戶完早卒無子以弟子羨襲爵魏封宗聖侯羨生震
晉武帝徙封奉聖亭侯歷太常黃門侍郎震生疑疑生
撫舉孝廉歷豫章太守撫生懿懿生鮮宋文帝襲封奉
聖侯鮮生乘後魏孝文舉孝廉封爲崇聖大夫復十戶
以供洒掃乘生靈珍襲爵歷秘書郎改封崇聖侯靈珍
生文泰文泰生渠北齊文宣帝改封恭聖侯後周宣帝
追封孔子爲鄒國公以渠襲爵渠生長孫隋文帝復封
爲鄒國公長孫生嗣哲應制舉歷太子通事舍人改封
紹聖侯嗣哲生德倫唐太宗封褒聖侯德倫生崇基襲

侯中宗授朝散大夫崇基生璵之玄宗追諡孔子爲文
宣王改封褒聖侯璵之爲襲文宣公兼兗州長史璵之
生萱歷兗州泗水令萱生齊卿德宗以爲兗州司馬臨
於東平卒憲宗元和十三年其子惟晳歸魯詔以爲兗
州參軍奉夫子祀惟晳生策歷國子監丞尚書博士自
璵之至策五世並襲封文宣公策生振懿宗咸通四年
舉進士甲科歷刑部員外郎振生昭儉歷兗州司馬曲
阜令昭儉生光嗣哀帝天祐中爲泗水主簿奉孔子祀
光嗣生仁玉後唐明宗遷冀丘令襲文宣公晉高祖改
曲阜令周高祖幸曲阜拜孔子廟及墓召仁玉賜五品

服復以爲本縣令仁王四子長曰宜舉進士不第乾德
中詣闕上書述其家世詔以爲曲阜主簿歷司農寺丞
知南康軍宜代還獻文賦數十篇太宗覽而嘉之召曰
問孔子世嗣宜因言歷代不預庸調周顯德中遣使均
田遂爲編戶乃下詔曰素王之道百代所宗傳祚襲封
抑在與制文宣王四十四代孫司農寺丞宜服勤素業
砥礪廉隅亟歷官聯洽聞政績聖人之後世德不衰俾
登朝倫以光儒習可太子右贊善大夫襲封文宣公復
其家遷至殿中丞雍熙北征受詔督餉涉拒馬河溺死
年四十六子延世特賜學究出身歷曲阜令襲封次曰

憲進士及第至工部員外郎知浚儀縣次曰龜應城主
簿次曰易進士及第延世子聖祐景德初始九歲賜同
學究出身大中祥符元年真宗封泰山聽聖祐衣綠階
位綬京官班幸曲阜謁孔子廟行酌獻禮宗屬並令陪
位又幸孔林又御止亭觀古碑加謚孔子玄聖文宣王
追封孔子父齊國公母顏氏魯國太夫人伯魚母并官
氏鄆國夫人擢聖祐太常寺奉禮郎又錄其近屬進士
謂同三傳出身習進士延祐習學究延渥延曾延齡並
同學究出身優賚以充奉祠廟延曾助予也時易爲殿
中丞通判廣州王欽若薦其有聲鄉曲召赴闕改太常

博士賜罷令知曲阜縣專主祠廟聖祐後改大理評事
天禧五年授光祿寺丞襲封文宣公知仙源縣事後改
名佑遷太子中舍卒年三十延魯復舉進士及第後改
名道輔勛仕止見道輔傳

崔頌字敦美假師人父協後唐門下侍郎平章事頌以
蔭補河南府巡官累擢左拾遺選右補闕歷仕漢周至
左諫議大夫宋初判國子監太祖每臨幸召頌與語因
及經義頌應答無滯及郊祀以頌攝太僕升車執綬上
問以一時典禮頌占對閒雅上甚重之未幾坐謫託有
司爲所親求便官出爲保大軍行軍司馬暴得疾卒年

五十頌好談諧善筆札篤信釋氏觀佛像必拜性多疑
在鄜州官舍嘗召圻慢者治堂室以帛蒙其目人皆笑
之于曉曠俱登朝曠字文炳第進士淹雅有士行至太
常少卿判將作監卒

尹拙潁州汝陰人梁貞明五年舉三史調補下邑主簿
歷仕後唐晉漢周至檢校右散騎常侍國子祭酒通判
太常禮院事宋初改檢校工部尚書太子詹事判太府
寺遷祕書監判大理寺開寶元年告老以本官致事拙
性純謹博通經史周世宗北征命翰林學士爲文祭白
馬祠學士不知所出遂訪於拙拙歷舉郡國祠白馬者

以十數當時伏其該博卒年八十一

田敏淄州鄒平人少通春秋之學梁貞明中登科爲國子四門博士歷仕後唐晉漢周至工部尚書改太子少保致仕恭帝卽位加少傅開寶四年卒年九十二敏嘗使湖南路出荆渚以印本經書遺高從誨從誨謝曰僕但能識孝經耳敏曰讀書不必多十八章足矣敏雖篤於經學亦好爲穿鑿所校九經頗以獨見自任如改尚書盤庚若網在綱爲若網在綱又爾雅板木槿注曰日及改爲白及如此之類甚衆世頗非之

辛文悅者不知何許人以五經教授太祖幼時從其肄

業周顯德中夢邀車駕請見既拜乃太祖也太祖亦夢
其來謁太祖異之及登位召見授太子中允判太府事
又有張遁張文旦者嘗與太宗同學校太平興國中詣
闕自言各起家爲主簿

李覺字仲明本長安人曾祖鼎唐國子祭酒蘇州刺史
唐末避亂徙家青州益都鼎生瑜本州推官瑜生成字
咸熙性曠蕩嗜酒喜吟詩善琴奕畫山水尤工人多傳
秘其蹟乾德中司農卿衛融知陳州聞其名召之成因
挈族而往日以酣飲爲事醉死於客舍子覺太平興國
五年舉九經起家將作監丞通判建州秩將滿州人偕

留有詔褒之就遷左贊善大夫知泗州轉秘書丞太宗
以孔穎達五經正義刊板詔孔維與覺等校定雍熙二
年與右補闕李若拙同使交州黎桓謂曰此土山川之
險中朝人乍歷之豈不倦乎覺曰國家提封萬里列郡
四百地有平易亦有險固此一方何足云哉桓默然色
沮還遷國子博士端拱元年春初令學官講說覺首預
焉俄獻時務策上頗嘉獎是冬以本官直史館右正言
王禹偁上言覺但能通經不當輒居史職覺倣韓愈毛
穎傳作竹穎傳以獻太宗嘉之故寢禹偁之奏遷司門
員外郎卒于宥大中祥符五年進上

崔頤正封丘人與弟倓並舉進士明經術頤正歷國
學直講遷殿中丞太宗召見令說莊子一篇賜錢五萬
判監李至上言本監先校定諸經音疏其間文字訛謬
尚多伏見博士杜鎬直講崔頤正孫奭皆苦心彊學博
貫九經問義質疑有所依據望令重加刊正從之真宗
召頤正於苑中說尚書大禹謨賜以牙緋自是日令赴
御書院待對說尚書至十卷頤正年老步趨艱蹇表求
致仕聽以本官致仕仍充直講改國子博士卒年七十
九倓倓淳化中爲直講太宗顧謂曰李覺嘗奏朕云四
皓中一先生或言姓用字加撇或云加點爾知否倓倓

曰昔秦時程邈撰隸書訓如僕隸之易使也今字與古
或異臣聞刀用爲角音惟兩點爲角音鹿用上一撇一點俱
不成字真宗幸國學召說尚書卽特賜緋景德後令講
道德經日於崇文院候對終篇賜以白金繒絲卒年七
十九嘗撰帝王手鑑十卷并注曹唐大遊仙詩十五卷
其子世安上之特賜出身

李之才字挺之青社人天聖八年同進士出身爲人質
朴無少矯厲師河南穆脩脩性寡合雖之才亦頻在訶
怒中之才事之益謹卒能受易脩之易受之种放放受
之陳搏源流最遠其圖書象數變通之妙秦漢以來鮮

有知者之才初爲主簿權共城今時邵雍居毋憂于蘇門山百源之上布裘蔬食躬爨以養父之才扣門來謁勞苦之曰好學篤志果何似雍曰簡策之外未有適也之才曰君非迹簡策者其如物理之學何他日則又曰不有性命之學乎雍再拜願受業於是先示以陸淳春秋意欲以春秋表儀五經既可語五經大旨則授易終焉之才器大難乎識者久不得調再調孟州司法參軍時范雍守孟亦莫之知也雍初自洛建節守延安途者皆出境之才獨別近郊或病之謝曰故事也及雍謫安陸之才洛檄見之洛陽前日遠送之人無一來者雍始

恨知之晚尹洙以書薦於中書舍人葉道卿因石延年致之曰參軍李之才年三十九能爲古文章語直意遂不肆不窘固足以蹈及前輩非洙所敢品目而安於卑位無仕進意人罕知之其才又達世務使少用於世必過人遠甚延年素不喜謁貴仕凡四五至道卿門通其書道卿薦之遂得改大理寺丞爲緱氏令未行會延年與吳遵路調兵河東辟爲澤州簽署判官澤人劉義叟從受歷法世稱義叟曆有揚雄張衡所未喻者實之才授之在澤轉殿中丞以憂去未幾卒邵雍表其墓

宋史新編卷一百六十三